

LQ 16-09-2024

Chaunt e vita illas giassas da Zuoz

Quista fin d'eivna es gnieu organiso per la prüma vouta il «Inscunter da chaunt a Zuoz». Cun quell'occurrENZA ho l'organisaziun intuorn l'iniziant Curdin Lansel vulieu creer – insembel cun üna tschientina da partecipantas e participants – ün nouv format da barat musical in Engiadina.

«Creer ün format per chanter, s'inscunter e fer experienzas musicalas.» – Cun quels plets vaiva *Curdin Lansel* circumscriet in ün'intervista d'avaunt ün'eivna l'idea ch'el ho concepieu ed organiso in fuorma dal prüm «Inscunter da chaunt a Zuoz». Quel inscunter es sto quista fin d'eivna da venderdi fin dumengia, ils 13–15 da settember 2024, ed ho do vita illas giassas da Zuoz.

Baselgia bain implida

Tuot ils concerts haun gieu lö illa baselgia San Luzi a Zuoz. E tenor indicaziuns da participants/as sun passa 100 personas stedas da la partida a la granda part da las occurrenz dal prüm «Inscunter da chaunt a Zuoz». Impustüt il venderdi saira, al concert dal cor da duonnas «Viva Voice» da Segl – cun partici-

paziun da surpraisa dal Cor viril Guardaval – es la baselgia da San Luzi steda bain implida. Düraunt ils trais dis dal «Inscunter da chaunt a Zuoz» ho que do concerts, scolaziuns da vusch, referats e discussiuns. I'l center es steda traunter oter la dumanda che effet cha la musica po avair süin l'umaun, süin quel chi fo o percepescha la musica. (fmr/dat)



Il cor da duonnas «Viva Voice» da Segl ho concerto in venderdi saira illa baselgia San Luzi a Zuoz.



Ün cor ad hoc – suot la direziun da Johannes Knecht – ho exercito e lura preschanto la sanda püssas ouvras.

FOTOS RTR